

# Plema d’aur sveglia il plascher da scriver

La FMR ha telefonau cun Alice Bertogg, promotura regionala dalla Lia Rumantscha en Surselva

SUSI ROTHMUND/FMR

■ **La finamira dalla concorrenza da scriver Plema d’aur ei da svegliar il plascher da scriver romontsch gia en giuvens onns. Pli baul ei per exempel era Arno Camenisch, igl enconuschent scribent romontsch, separticipaus pliras ga alla Plema d’aur.** Per animar scolaras e scholars da scriver in text, fan promoturas e promoturs regionalis visetas en scolas dalla Romontschia. En Surselva ein quei *Alice Bertogg* e *David Flepp*. Pervia dils motivs enconuschents han las visetas cumbinadas cun luvratoris da scriver denton buca saviu haver liug quest unviern sco previu. El l’Engiadina hai dau entginas purschidas online. La fin da mars (datum dil bul postal) ei il davos termin per inoltrar texts per la concorrenza da scriver Plema d’aur.

*Dapi cu dat ei la concorrenza da scriver Plema d’aur e nua ha quella siu origin?*

*Alice Bertogg:* Quella ei vegnida iniziada avon varga 20 onns dalla Renania. Igl intent era gia lu da svegliar il plascher da scriver e probablamein era da survegnir sin quella via texts pil calender. Ei deva era ina categoria da carschi. Pli tard ha il post da lungatg dalla Lia Rumantscha (LR) a Cuera surpriu l’organisaziun dalla Plema d’aur e culs onns las sedias ellas regiuns. Dapi 2014 han las rangaziuns liug en plirs loghens, numnadamein el Grischun Central, en l’Engiadina ed en Surselva.

*Igl intent ei oz sco avon 20 onns il medem?*

Gie, nossa finamira ei oravontut da promover il plascher da scriver dils affons, giuvenils e giuvens carschi entochen 25



«Igl impurtont ei da dar spazi alla fantasia.»

Alice Bertogg  
promotura regionala

onns. Ei dat quater categorias. Ils em-prems treis victurs da mintga categoria survegnan premis en fuorma da daners. La rangaziun dalla Plema d’aur 2021 havein nus previu da far ils 2 da zercladur. Co e cum ei aunc aviert. Sche pusseivel denton cun in hosp da sorpresa. Ils texts victurs da mintga categoria vegnan prelegi dallas scolaras e dils scholars ed ei vegn a dar ina laudatio da mintga victur(a) d’ina persuna dalla giuria. Alla giuria sursilvana separticipeschon: *Sabina Candinas, Manfred Veraguth* e *Hugo Schär*.

*Per animar activamein ils affons e giuvenils da scriver ha la LR pia elaborau luvratoris ch’ella porscha allas scolas.*

Quei ei aschia. Nus contactein las scolas e visitein allura las classes che giavischon quei. Duront il luvratori dein nus tips da scriver e quei a moda ludica e lucca. Ils affons e giuvenils emprendan co in text duess esser structuraus e vesan ch’igl ei nuota aschi nausch da scriver enzatgei. Ei ston buca far nundetgas retschercas per scriver in bien text, igl impurtont ei da dar spazi alla fantasia. Jeu hai constatau ch’ils affons ein mintgamai fetg attents ed interessai duront il luvratori. Forsa era perquei ch’ina persuna d’ordeifer surpren per in mument l’instrucziun. En connex cullas restricziuns pervia dil coronavirus havein nus denton buca saviu visitar las scolas dapi il schaner. Persuenter havein nus purschiu luvratoris online ni surdau la documentaziun allas scolastas ed als scolasts.

*Ein quels vegni nezegiai stedi?*

Gia avon dus onns havein nus entschiet a far luvratoris cun scolaras e scholars.

Quei ei stau in success. Era quella gada eisi stau pusseivel da visitar entginas classes, deplorablamein denton buca tut quellas che havessen giu bugen quella purschida. Scolastas e scolasts s’occupan denton era sez da quella tematica duront l’instrucziun.

«Duront il luvratori dein nus tips da scriver e quei a moda ludica e lucca.»

*Actualmein ei bia scumandau ni frenau – scriver astg’ins adina. Forsa han bia dapli affons e giuvenils inoltrau texts quella ga?*

Nus havein constatau ch’ei dat sco undas, ina ga vegn ei inoltrau bia texts d’affons dalla primara e l’autra ga d’ina altra categoria. En l’Engiadina ha ei pil solit massa participont(a)s. En Surselva ei quei fetg different. Il 2019 havein nus survegniu da quei da 200 texts, quei ei fetg bia. Uonn vegn ei a dar pli paucs,

mo il termin d’inoltrar texts ei aunc buca scadius. Entochen ussa han duas scolas tarmess texts ed jeu sai aunc d’autras che havevan interess. Sin atgna iniziatiava inolteschan sulet singuls in text. La victura dil 2019 ella categoria dil scalem superiur ei ina giuvna ch’ei separticipada «privat» alla Plema d’aur.

*La scena da litteratura romontscha ei pintga ed ins po persequitar bein la via da scribentas e scribents. Ei dat participontas e participonts dalla Plema d’aur che ein era onns suenter enconuschents e han plascher e success cun scriver. In exempel ei segir Arno Camenisch.*

Exact, lez ha entschiet sia carriera tier la Plema d’aur (ri). Na, quei fuss secapescha brav prepotent da pretender. Fatg ei denton ch’el ei separticipaus pliras ga. Il 2001 ha *Arno Camenisch* recaltgau «mo» il secund plaz ella categoria 17-30 onns. El haveva lu 23 onns e siu text purtava il tetel «4 secundas». La Plema d’aur vegn buca ad esser il motiv da siu success mo tuttina ha ei forsa dau in pign stausch. Quei muossa ch’igl ei impurtont da separticipar e sch’ins fa lu aunc in bien plaz dat quei curascha e slontsch da cuntinuar. Ei sto gnanc esser igl emprem plaz.

*Vus senza scrivis columnas en La Quotidiana ed auters texts. Essas Vus era gia separticipada alla Plema d’aur?*

Na, deplorablamein buca. Da quei temps ch’jeu fuss aunc stada giuvna avunda per separticipar era la Plema d’aur buca enconuscenta a mi ed era en scola fuvu quei mai stau in tema. Persuenter animeschel jeu oz mes agens affons da scriver ina historietta ed inoltrar quella.

## ■ MUSTÉR

Trofea Péz Ault cun «Trofea Challenge»

(cdm/fmr) Las cundiziuns actualas en connex cul virus Covid-19 lubeschon buca l’organisaziun dalla cuorsa cun skis da turas «Trofea Péz Ault» a Mustér. Tuttina dattan ils organisaturs cun *Giochen Berarth* alla testa als adherents da quei sport la pusseivladad da semesirar. Persuenter han els lantschau la «Trofea Challenge» sin Strava. La partenza dalla concorrenza ei alla fatschenta da sport al Catrina Resort, gest sper la staziun da val dallas Pendercularas Mustér SA. Il final ei a Caischavedra alla staziun dil runal sut la staziun dallas pendercularas. Il percuors culla lunghesia da 4,7 kilometers e 704 meters differenza d’altezia ei signalisau dapi l’entschatta da fevrer cun petgas ella colur rosa. La concorrenza cuozia entochen la fin da mars.

Tuttas informaziuns dalla «Trofea Challenge» e davart l’installaziun dall’app «Strava» dat la pagina d’internet «[www.trofea.ch](http://www.trofea.ch)».

reclama

Agid per gidar sasez  
Procap Grischun, l’Union grischuna d’impedis, gida dapertut nua ch’umans na vegnan betg pli vinavant pervi da lur impediment. Gidai era Vus!

Procap Grischun  
Hartbertstrasse 10, 7000 Cuira  
Tel. 081 253 07 07, PC 70-7755-0  
[www.procapgrischun.ch](http://www.procapgrischun.ch)

**procap grischun**  
per persunas  
con handicap

## «Ei va da viver senza medias socialas»

Per sia lavur da matura ha Estella Mazzetta desistiu duront in temps dil telefonin

HANS HUONDER/FMR

■ **Esser informaus e saver comunicar da tut temps e dapertut: Quei secapescha oz da sesez. La maturanda Estella Mazzetta ha vuliu saver, sch’igl ei pusseivel da desister dil consum da medias socialas duront in temps. En sia lavur da matura al gimnasi dalla claustra a Mustér vegn ella alla conclusiun che quei ei bein pusseivel.** La massa d’informaziuns via internet, la purschida dallas medias socialas e las pusseivladads da comunicar s’audan tiel temps modern. Buca mo ils giuvens, mo-bein era persunas dallas autras generaziuns sesurveschan dall’offerta. Tgi pli bia e tgi pli pauc. *Estella Mazzetta* da Mustér ha vuliu saver dapli. Ella ha vuliu endriescher surtut sch’igl ei era pusseivel da viver offline, vul dir senza colligiazion d’internet: «Jeu hai vuliu saver co pli veglias generaziuns sesentevan avon 20 ni 40 onns senza quella purschida. Mo lu era sch’ina veta offline ei veramein aschi enrihonta sco ins auda ina ga ni l’autra.» Per saver far quell’experientscha ha ella desistiu da medias socialas duront dus meins: «Jeu hai bloccau las medias socialas e mess il telefonin dalla vart e hai nezegiau sulettamein il laptop per la lavur da scola. Sch’jeu hai telefonau cun enzatgi, lu sur la reit da telefonia normala.» En quei autotest eis ella vegnida accompignada duront in meins da sia sora Aviva.

«Ins s’endisa»

Ad Estella Mazzetta eis ei reussiu aschia da cumparegliar la veta cun, respectivamein senza igl access agl internet: «Dus

meins senza quella purschida ei liung. Ei ha dau muments ch’jeu havess bugen mirau sil telefonin, mo ins s’endisa fetg spert da desister da quei.» La veta senza telefonin seigi buca’altra, ins sappi senz’auter viver senza quel: «Igl empremument tratg’ins sappi Dieus tgei mida-

da che quei seigi. Ei semuossa denton spert ch’ins ha dapli temps per auter. Era croda il stress da haver il sentiment da stuer mirar trasora sil telefonin.» En quei connex ha ella lu era fatg l’experientscha ch’ei dat dapli temps per tschintshar cun enzatgi ni per exempel da far in gi-



**Estella Mazzetta: «La pretensiun ch’ins sappi buca viver il 21avel tschentaner senza medias digitalas ei fallida.»**

MAD